



Hirmstõovvmõõžžäst tuõivvu

Gu sij le'jje käigštõovvâm tä'st, sij õõudâst čuõžžu kroota kue'htt ämma kumccõõdi čuõ'vves pihtsin. Neezzan suõrggne da kiõ'čče pâi maddu. Leša ämma sarnnu si'jjid: "Mõ'nt ooccve'ted jie'li jaa'mmji jooukâst? Ij son tääi'b leäkku, son lij kaggõõttâm jää'mmjest. (Luuk. 24:4-6.)

Jättõovvmõõš da hirmstõovvmõõš liä sää'n, kook kovvee Isõõzz taaurõõžži vasttõõzzid suu ääu'dstes e'jjpeei'v tue'lää. Sij jättõ'vve päll'jeen, što leäi šõddâm ääu'd riõ'vvjummuš. Sij hirmstõ'vve, gu jiä vuäittam fi'ttjed, mii leäi šõddâm. Käigštõovvmõõš vaajtõõvi kuuitâg kuärgcen rämman, gu pâajaskaggõõttâm Kristõs i'lmstõõvi si'jjid, da sij vuäžžu määusat ääsk, tueiv da jie'llem.

Strääznaipiâtnen Isõõzz õlddâz le'jje vuäjjam panntuõivvu da määngas see'st le'jje čõ'kkääm. Mätt'tõspäarna lâä'nnõ'tte lokkuum uusi tuäkka u'čtee'les jää'mmem mâñña. Sij le'jje põõl vue'lnn da ju'rdde, što ij sij pue'ttiäi'jes vuei't lee'd Isõõzz kõrr jie'llem pue'rab.

E'jjpeei'v ee'des poodd šõõddi kroota mii-ne, kää'tt muäri mätt'tõspaa'rni äälglaž da sii'ske lookkid: kuäras ääu'd hirmstõovvmõõžž mâñña sij vuäzzu teivvad Pâajaskaggõõttâm Šuur. Son, kää'tt leäi taaurõõžžeez ääsktam äärram pâajaskaggõõttmõõš da jie'llem, čuä'jti sää'nes tuõttân da tiudi läppõõzz. Čõ'kkeejin da põõlčõs mätt'tõõđjin šõ'dde sme'llkõs pâajaskaggõõttmõõžž tuõđšteei.

Äskkam i'lla vuei'nnem le'be teäđ vää'rest. Jeä'p ääsk Vuäspääda, Kristõ'sse le'be Pää'ss Jiõ'gõge tön diõtt, što leä'p Vuäspää'd vuäinnam. Äskkam lij Vuäspää'd šõddeem, mi'jjid skiiñkkân uvddum. Nääi't äskk lij mee'st šõddi õõmäs aivv seämmanalla gu luätt kâccai moodrõs naa'lin seu'ññes tää'lv mâñña õđđ jie'llma.

E'jjpeei'v äären tän ee'jj kalentee'rest mõññu kiõđtää'lv, vuäžžap ju'n ää'n jiiijân čõõ'lmin tuõđšted tän õđđ jie'llem kâccjem luäđast. Oulu aa'rhelkää'dd saaujbeä'lnn e'jjpeei'v vie'ttjet ju'n kookkas õuddnam kiid tobdlmin. Aa'rhelkää'dd tâä'vbeä'lnn tä'lvv äänn vól luäđ kiõđines. Luätt kuuitâg tuõđast juõ'kkää'jest E'mmelstes. Ođđ jie'llem luäđast lij mâte pelkkmõõžž da mušt'tõõzz õđđ jie'llmest Kristõõzzäst.

E'jjpeei'v rämmjuhll kuäras ääu'd muõrrkarddest lij läppõõzz teäuddjõs. Vuäspää'd läppõõzz jiä tiuddu pâi Biblija lõõstin da historâst. Tõk tiuddne še tä'bbe, juõ'kkää'jest to'ben, ko'st oummu puä'tte vuässli'žžen pâajaskaggõõttmõõžž evanğe'liuumest. Läppõõzzâs meäldlânji Kristõs lij ä'rnn to'ben, ko'st kue'htt le'be kolmm liä noorõõttâm suu nõõmsteez. Läppõõzzâs meäldlânji Kristõs lij peittum naa'lin, leša tuõde'ld ä'rnn pâä'ss pričaazzäst. Še mij jie'llem lookki čõõđ Kristõs tätt pue'tted da suu ärmes kâ'mard vuälas mij rie'kkid (virss 104). Tuõ'di Kristõs lij pâajaskaggõõttâm!

Jukka Keskitalo
Pispp
Oulu aa'rhelkää'dd